

Fida Nyamesemka: Dzifuu 23, 2013.
(Friday sermon – 23rd August, 2013 – Fante Translation)

**JALSA SALANA UK 2013 (ODODOW EHYIADZI WO NGYIRESI
ABOROKYIRMAN MU) NA AHCHOYE.**

Ber a okrantsee tashud, ta'awuz na Sura Al-Fatiha wiee no, Huzuur kaa de:
Allah, Osorsornyi no N'adom ntsi Jalsa Salana UK behye ase wo Fida a rebra yi. Inshallah, dwumadzi a ofa no Jalsa yi ho hye ase mber kakra ara yie ansaana Jalsa nara edu. Ngyiresi Aborokyir Ehyiadzi ye adze a ne nhyehyee ma wokyerkyer mpirempiren kurowpon ma otwa mu wo nda kumaabi mu. Ber a nna Jalsa si wo Pakistan no, nna nhyehyee a oda ho daadaa a woma nkorofa asoee a wotoo hon dzin langar khanas. Ber no a nna skuul na kolegyi adan no dzi wo Jama'at no nna ho nye atonsafrefo hon asoee na ber a adzesuabea bedzii aban nsamu no wosisii dabew adan a wotsetse dem.

Onam de nyimpa dodow daho wo ho a wobeba ntsi mpirempiren dabew wode nna wosi. Se yedze dem nhyehyee yi si nkyen a nyimpa dodowara so a woye atonsafrefo no, hon a wotse Rabwah hwee hon yiedzi wo honara hon efiefi ma langra khanas so hwee hon edzidzi mu. Dem ntsi nhyehyee a otsim ho daadaa na dza otse de ntswamuhun nyinara wo ho a wohwee atonsafrefo hon eyiedzi wo Rabwa Jalsa ho; hon a wawea mbre wosi gye atonsafrefo wodze mfe pii atsetse hon wo ho.

Ketseankye Allah dze enyigye, sunsum mu ahotu ehyira hon ma kwan ebuei ama hon ma wasom. Demara na siesiara so Qadian ho woye nhyehyee a otsim ho daa. Se yehwe mpirempiren nhyehyee a ono yehu no wo Jalsa Gah- bea a woye ehyiadzi nara. Oye nokwar de ofa no langra khanas ho no, edwumayefo wode wodze hon ba boboa edzibanye na roti (paanoo) no ntoe mu.

Germany so onam de asa (hall) wo ho ntsi ehiadze pii wo ho a etsintsim. Owo de woye edziban na paanoo a woto no adzetonfo ho no wodwen de oye amon, modwen de onkyer koraa no, odzi beye ndaawotwe. Se onntse dem na oye amon a woma metse no ntsemara- odze roko adzesaaber mu no, osiande wawia nsem a wotue m'aso wo ho papaapa. Demara so na otse wo Jalsa a woye no mbeambea wo wiadze yi mu. Mbom, UK Jalsa dze abeye wiadze nyina ehyiadzi bea osiande Khilafat tse ho. Okesi mfedaa no nna Jalsa ne nhyehyee nyina ye mprenpren dze. Ber a nna woye Jalsa wo Islamabad no, nna nhyehyee a etsim wo ho, ma edzibanye no demara so na nhyehyee a etsim wo paanoo no ntoe a wodze efir to tse. Onam de woeyi Jalsa no ko Hadeeqatul Mahdi ntsi woye edziban wo ha a wodze mprenpren ndzamba ye beye mfe ebien anaa ebiasa osiande nna oye dzen de wobeye edziban no wo Islamabad na wodze bokoko ho, roti (paanoo) no bi a wohia no woto no Islamabad na bi so woto no wo adzetonfo nkyen. Hwe, oye ahokyer pii onam iynom ntsi.

Dem ntsi yeboo mbodzen de yenye apaamu ho aban n'asoee dzii ehyia de wobema hen kwan ma yeesi gyaadze ntsimii wo ho de yebonoa edziban ama yeegyae de yebeye edziban

noabea a ɔye mprenpren a yedze patatam besi a ɔye ɔhaw na kwan bi do no so ɔdze mbusu ba. Aban no Kuw no hɔn adom ara wɔmaa hen kwan ma yesii gyaadze a otsim kesenara wɔ afe yi mu a ɔye Nyankopɔn ne pe a ber a ohia de wɔnoa edziban no wɔbɔnoa.

Mbom ɔfa no roti (paano) no ntoe ho no, ber a motwee hɔn adwen gyinaa iyi do no, Ameer na n'apamfo kyerɛe de ɔkwan dadaw noara na wobodua do ato roti wɔ Islamabad na wɔato nkaa no wɔ adzetɔnfo hɔ. Ber a mekyerɛe hia a ohia de yesi efi wɔ hɔ no wɔdween no bo ho na wɔtwetwee hɔnho. Mekaa de Asoe hɔ bɔbɔ hɔn bosa ma wɔdze esi efi no wonyaa nkenyan de wɔbɔbɔ ho kaw no. ɔnam Allah N'adom ntsi, roti efi no wɔato efi Lebanon na Ahmadiyyanyi nokwarfo bi a ofi Pakistan kɔr Lebanon kɔtɔ efi no dze sii mu baa ha begyinaa no. ɔda ho ara redandan efi no. O'anya esuahun dze efi no bi ekesi Rabwah na Qadian so. Dem ntsi dem dwumadzi yi wodzii no wɔ kwan a odzi mu mapa do wɔ ha so. Ntsi seisei dze, ɔnam Nyankopɔn N'adom ntsi nhyehyee a etsim wɔ Hadeeqatul Mahdi wɔ edzibanye na roti ne nyee mu. Kwan biara mu, yedze ndaase ma aban no kuw no wɔ de ɔmaa hen kwan. Nyankopɔn ndom hɔn .

Mbom, Jalsa yi da ho dzi mu, se yedze to Jalsa a wɔye no wɔ wiadze ne fa bi a, osiande mpirempiren nhyehyee pii wɔde wɔye ma dɔm a hɔn dodow beye ɔpepe eduasa (30,000), nkanka se nsu to a ɔma ɔhaw kese ba anamɔn kwan no mu ɔnye dabew mu. ɔfa no ɔhaw a anamɔnkwan dze ba no yetum sɔw ano ara yie a woyiyi nsuka toto ho, mbom ntamadan no a woesisi aye no dabew no na edziban ho nhyehyee na ndzamba bi so da ho wɔ hɔ a yenntumii nnsiw ano yie. Na ɔye Nyankopɔn Ne pe a mber bi beba a dem ndzamba nyinara yebesisiw anon a dem mpirempiren kurowpɔn botum adan aye kurowpɔn a obetsim ama Ahmadiyya Jama'at. De mber mekaa no dem dwumadzi yi ye mpirempiren adzeye na dwumadzi yi ne kesenara hɔn a woetu hɔnho akye a wofi Khuddam Kuw no na Ansarfo wɔtse hɔn mpɔw mu no na wodzi. Jumma a etwa mu no mokɔpuei Hadeeqatul Mahdi na muhun, dem mber no, se yedze hɔn a woridzi roti efi noho dwuma no si nkyen a, mbofra na mbrentse na nkɔdaa reye edwuma a ɔfata hɔn na wɔrobɔ mbɔdzen reye dza wobotum ama esi gyina de nhyehyee a ɔfa Jalsa noho no woedzi ho dwuma ma ako yie mapa. Ha so, mepɛ de mema ɔda edzi de roti efi ne nhyehyee no nnye edwumakuw biara a onnyi Jama'at no mu no nna woetu hɔnho ama, hɔn a wɔawia mfirdwuma ho na nkorɔfo a wɔwɔ nyimdzee mapa wɔ ndzamba bi ho na wodzii.

Ketseankyɛ Allah ɔsorsornyi No aye hɔn adom wɔ edwuma a wɔyee yi ho. UK dwumadzi no dze, dza ohia ara nye de wobedzi, ɔntse de dza osi wɔ India anaa Pakistan a kwan a wodua do dzi dwuma ɔmmfa obiara ho no osiande wɔnnhwehwe hɔn dwumadzi no mu. Wodzi dwuma de ɔye ntwamuhɛn. Se dadzehoma sensen hɔ a ɔno wɔma ɔsensen hɔ anaade mber ɔbeyɛ no ɔnye. ɔntse dem wɔ ha. Ha dze mpenpendo biara wɔhwe mu yie na Aban edwumayefo ba bɔbɔ ho aprɔw na ɔgye to mu ansaana etwa edwuma do. Allah, ɔsorsornyi No N'adom ntsi nhyehyee a ɔwɔ roti efi na gyaadze ho nyina wodzii do wɔmaa ho kwan de wɔnye. Dza morohwehwe aka nye de ɔnam de ekehia de wɔye mpirempiren nhyehyee a ɔso ntsi ɔwɔ de yeku hen ntsin ye edwuma- se yedze hen dze to mbeambea binom hɔn dze ho a, na Allah N'adom ara Ahmadiyya etuhoakyefo dze aho nkenyan kese dzi

dwuma. Dem sunsum, de yebotu henho ama onam Jama'at yi ntsi nye Ahmadiyyanyi n'ahyensew.

Ahmadiyyafo bo afor biara. Ndadzendadze Kuw (Engineers Association) wo ho a woridzi honara hon dwuma. Adatser Kuw wo ho a woridzi honara hon dwuma. Afei binom so wo ho a wawea edwuma ahorow ho a wodze hon mber ma na iynom a nye Jalsa ho edwuma nko no, osi wo afe kwansin no mu. Iyi ye adze a nye nwanwa na nye soronko ma Ahmadiyya Jama'at a oma woye etuhoakye edwuma kese. Edwumaho ntsetsee na nwomasua nna ekowie dem yi nkanka ara se yehwe hen kusum a yedze som atonsafrefo a wowa Jalsa ho- dem kusum yi nye ampaara, Ahmadiyyanyi no dwumason. Mbofra, mbrentse na nkodaa dze enguan, hon nyinara edwuma ho sunsum ahye hon ma. Edwuma biara a wodze hye hon nsa no wodze etuhoakye sunsum ye. Na wo de obo no demara osiande atonsafrefo a woba Jalsa ho no ampaara de woye Anohoba Mesia (ANN) no n'atonsafrefo.

Dem ntsi dem ahohosom yi ye brapa ne nkyere na mbre hon gyedzi tse. Mepede mema obiara n'aso tse de, mbre Anohoba Mesia (ANN) no sii dzii ne ndwuma a ofa no ahohosom ho ntsi hen ahohosom ne mpenpendo wode oko sor na mpo odzi mu ko kan. Da kor bi, Anohoba Mesia (ANN) no nna noho mmfa no ma orom. Nsatofrefo bi kor de orokohwehwe no ma womaa n'aso tsee ma opuei beka de nsatofrefo no wo ho kwan de wosom no hoho osiande obere ana obo ha. Dem ntsi oefir edzi de oredzi no dwuma ama nsatofrefo no. Dem ntsi nde so, ahohosom a otse dem yi wokyer kyere Anohoba Mesia (ANN) ne nsatofrefo no osiande kwan a wodze rema hen nde yi nye de yebegye ahoho a woye Anohoba Mesia (ANN) dze eso woye nsatofrefo a wonom nyamesem ho. Woreba osiande wope de wotse nsem a ofa no Allah na Ne Somafo Nkomhyenyi Kronkron Muhammad (NNN) ho. Woreba osiande wope de wonya sunsum na obrapa mu kanko. Woreba ha osiande wope de woma anyenkoye mu odo na korye tsim eso no mu ye dzen.

Nsatofrefo pii wo ho a wonom ahokyer na ohaw bodwirir ha. Binom tsetse ahokyer a nye dzen wo hon efiefi. Woba ha besere mber wo tsebea a nye dzen mu. Eso woyi iyi nyinara akwa na woba. Binom fi ohia kokobin mu na woba, wodze honho to adzesoadze a nye dur do ama woenya Jalsa nhyira. Anohoba Mesia (ANN) ne nhyedo ntsi na woba; na wonom new fre do. Woba behyia mber yi do Khalifa na wotsie ne kasaa. MTA, ekyingye biara nnyi ho de Ahmadiyya ne wiadze aben ho mbom Jalsa ne ntwa ho na noho akondo noara mpo twe noho na oda noho edzi soronko. Ntsi mma yendwen "ahokyer" a nde mber yi wo ho a nsatofrefo roko mu a wodze ba Jalsa no. binom wo ho a hon enyin efir papaapa a wonnhwe yaw na fona ahorow a hon akwantu dze ma naso woba Jalsa. De mbre m'aka no, binom dan hon ahot na awerekyekyer a wo hon efiefi onam gyedzi ntsi na wotu kwan bo kwan do beda pata ase na wodzi famufamu edziban. Dem ntsi dem nsatofrefo wo kyefa kese bi a wo de wohwe hon yie. Onam Allah Osorsornyi No N'adom ntsi, nsatofrefo pii wo ho a woba Jalsa ara keke, wonnyi siantsir biara. Na nde Jalsa ko no bo ako sor papaapa. Mbom wotua ho kaw naaso ommfa hon ho. Ntsi nye nhye ma hen de yedze obu ma ahoho yi. Woyinom nye ahoho a wose obu a okron mapa. Hon tsirmupow nye de wobonya Allah na No Somafo no enyimpa.

Ber a orutu fo wo asem yi ara ho wo ber bi mu no, Anohoba Mesia (ANN) no kaa de:

Hwe, nsatofrefo pii ebodwir. Binom inyim hon na ekaa hon na binom so nntse dem. Ntsi adzepa a owɔ de eye nye ekyere ahobrase na ehu obiara de ɔse obu na enyimnyam. Motwer hom wɔ papaye mu na megye dzi de hom bema nsatofrefo enya ahomka biara a ɔfata. Hom nsom ahoho de mbre wobotum. Na ahoho yi nyinara ye Anohoba Mesia(ANN) dze na wɔaba ha pɛpɛpɛ de gyedzi ntsi. Hon tsirmupɔw nye de wobenya Nyankopɔn N'enyimpa na N'enyigye. Dem ntsi owɔ de yetsie nkwankeyere a ofi Anohoba Mesia (ANN) ho na hen enyi nsɔ enyidadopa a ɔrohwehwe fi hen nkyen no. Na hen akoma nnya atsenkapa na ɔpɛpa ama yeasom ahoho no de mbre hen ahom botum. Na aber biara hen akoma wɔ de yedze adwen bi hye mu de hen nsatofrefo wɔ hon kyefa.

Beebiara a wɔdze dwumadzi bi behye hen nsa de yendzi no yebɔbɔ mbɔdzen edzi ama nsatofrefo no. Dem adwen yi wɔ de ɔhen edwumayenyi biara n'akoma na n'adwen mu ama enyidadopa a Anohoba Mesia (ANN) wɔ no wɔ honho no ahye ma. Ama yeetum aka de "O! Mesia (ANN) a Nyankopɔn soma no, na O! Nkɔmhyenyi Krɔnkrɔn Muhammad (NNN) no Nokwar Dɔfo yeetu henho ama de yebedzi wo kwankyerɛ biara na w'afotu do". Ampaara iyi nye adze pɔkyee a wohia fi Ahmadiyyanyi ho. Akwantu a ɔbor mfe ɔha nnkema yeeguan efi w'enyidadopa a ofi hen nkyen ho. Nde ara mpo hen mba, hen mbrentse, hen nkɔdaa na hen mbasiafo nyinara robɔ mbɔdzen de wɔbehye hon dwumadzi biara ma de mbre ahom botum na ɔye Nyankopɔn Ne pɛ a wɔbɔkɔ do aye iyi.

Ohia de aber biara yedze dem ɔpɛye yi na awerɛhyemu na yaw a Anohoba Mesia (ANN) wɔ yi to hen adwen do. Yerema dem adwen yi edzi hen bano no, owɔ de yeye aso de, "Aber biara ɔye me atsetsee de nsatofrefo bohu amandze wɔ yaw anaa nkotroka mu". Ampaara aber biara mutu fo na wɔw do de kwan biara mu wɔbema ahoho no enya ahoɔ biara. Nsatofrefo n'akoma nnkyer bɔ; ɔtse de bɔdambɔ sin, se ennsuo mu yie ketsekette mpo a ɔbɔbɔ. Dem ntsi iyi ye afotu a ohia papaapa. Onnyi de iyi ye hen ano famfa ara. Owɔ de yedze kɔ nyee do ma ɔye hen mfatoho. Jalsa si wɔ ɔman biara mu, mbom nkanka ara ha dze nkorɔfo a wofi wiadze ne fenandze nyinara ba ha na hon apɛdze na hon enyidado; na iyi gyina mbeambea a wofi na mbre hon yebea tse, eso mbre wosi ko kodzen no so ye soronko. Kwan a wodua do kasa na mbre wosi kyere hon enyigye na hon ayewdzi so ye soronko. Hon ehiaɔze na dza wɔpɛ nyinara ye soronko. Dem ntsi, yefa nyansakwan a ɔkrɔn do nye hon dzi nkitaho.

Dem ntsi na owɔ de yedze Anohoba Mesia (ANN) no n'akwankeyere a wɔto no abaw a onnyia eso ɔye nwanwa hen banodzifo mu. Se yeye setsie ma iyi a, hen dwumadzi nyina bɔkɔ do tɔtsenn de. "Nsatofrefo n'akoma nnkyer bɔ, ɔtse de bɔdambɔ sin, se ennsuo mu yie ketsekette mpo a ɔbɔbɔ". Se obiara a oetu noho ama de ɔrosom ahoho suo dem afotu yi mu dzen a, ɔno ntawantawa nketsenketse a osisi daapem no nnkesi, gyede annhwe a nkorkor nkorkor bi. Wɔnnkɔbɔ sombo biara gyede bi a nna obi pɛ de odzi nsemhun. Dem tsebea yi mu dze, obehia de wɔfa nsiwano dzendzen do.

Mfeda, asem bi sii wɔ Mbaa aponto bi ase. ɔbaa bi a ofi ekyirekyir bae yee basaa wɔ biribi ho. Dem asem yi a osii yi nnye de obi dzi fɔ anaa odzi bim na yerehwe. Dza owɔ de yeye nye de yehu de asem sii ntsi na owɔ de yeye nsesa bi kyen de yedze nkyerekyeremu pii beba. Dem ber yi ohia de yehwe yie wɔ nsatofrefo a wɔwɔ Tabshir mu, mbanyin na mbaa

nyina amma wɔammfa obiara annto yaw anaa amandze biara mu. Merekasa fa nsatofrefo a wofi amanadze ho. Mbom nsatofrefo biara ye nsatofrefo. M'aye nsesa bi wɔ edwuma yi ne fa a ɔhwe dem dwumadzi yi do. Dem nsesa yi fa no edwuma no ne nyee ho, na iyi twe waqfeen-e-nau na waqfat-e-nau . Afei Allah N'adom ara waqfeen-e-nau na waqfat-e-nau pii enyin edu mpenpendo a wobotum aye edwuma a wɔdze ahye hɔn nsa. Binom hwe Jama'at hɔn ahyedze do a etsim na binom so ba ma ɔye mpirempiren nhyehyee no mu.

Mowɔ enyidado de afe yi hen som bedzi mu akyen mfeda dze no. mbom kaa de kankɔ mmba de ebesea enyim anaa dzibewdzifo nko. Mbom yehia de yebɔbɔ mpaa ama Nyankopɔn de N'adom bodwir hen do na aye hen ndzeyee na nsemka ne fa bi na ama yeaye dza yeka na woehyira hen na yeaye edwuma a Nyankopɔn pe de yeYe. Na yenhwehwe dem tum yi mfi Nyankopɔn hɔ. Na yensɔr so de mma ber bi mmba a biribi besi a ɔremma yennya ntseasee.

Ɔfa no ahɔhoson ho no, mepɛ de mema ndzemba bi da edzi pefee de, Ahmadiyyafo a wɔtse England nkanka hɔn a wɔtse London no, wɔ de wɔhwe hɔn a wofi amanadze reba no de wɔye hɔn ahɔhoe. Dem ahɔho yi, dodow beye mpem ebiasa (3000). Se wɔma akwantu ho nkrataa nyinara a ɔno hɔn dodow no bɔbor. Ɔmmfa ho de UK Ahmadiyyanyi bi wɔdze dwuma bi ahye ne nsa, wɔmbɔ mbɔdzen ara de nyimpa biara a ofi amanadze aba no wɔbefa no de hɔn hɔhoe. UK Ahmadiyyanyi a dwumadzi biara nhye ne nsa no so ye ɔhɔho dze. Mbom nsatofrefo a ofi amanadze wɔde UK Ahmadiyyanyi fa no de no hɔho. YeKa no nsem fofor mu a, ɔtɔfabi a, ɔwɔ de wɔhwe hɔho a ofi amanadze ansaasa wɔahwe UK Ahmadiyyanyi. Mber bi ba a, ɔwɔ de UK Ahmadiyyafo dze hɔn apɛdze bɔ afɔr. ntsi mber nyinara hom nkaa de kansa hom ye nsatofrefo mpo a, gyinabew bi ba ma hom dan beye afrefo. Iyi nnye dwumadzi bi a wɔdze ahye binom nsa- mbom dem adwen yi wɔ de dodowara fa. Se yebotum afa dem adwen yi a, gyede yeYe krado de yɛdze henho bɔbɔ afɔr wɔ dem kwan yi do. Se ɔba no dem a yebohu Kuw a ɔye few papaapa.

YeFa Nkɔmhyenyi Krɔnkrɔn (NNN) n'enumsem bi a, obi nya adwen bi de, ɔwɔ de ɔye ɔfrefo kyen de ɔbeye nsatofrefo. Hadith bi ka de, ɔfrefo ye gyedznyi mapa biara n'ahyensew. Hadith ka de, Nkɔmhyenyi Krɔnkrɔn (NNN) kaa de "nyia biara a ɔgye Allah na Atsenbuda no dzi no wɔ de ɔdze obu na enyidzi soronko ma ɔhɔho." Obiara a wɔammfa obu na enyidzi amma nsatofrefo no, nna ɔye mberew wɔ gyedzi wɔ Allah ne Atsenbuda no mu. Ɔnam dem ntsi, Anohoba Mesia (ANN) no atwe adwen egyina ahɔhosom mapa do mpen pii osiande no Wura na ne Kwankyere ɔnye Kuran Krɔnkrɔn ne nkyerekyere. Iyi behye hen gyedzi mu dzen.

Wɔ Hadith fofor bi mu no so, Nkɔmhyenyi Krɔnkrɔn (NNN) kaa de, de edze serew na enyigye behyia wo nua no ye ndzeyee a ɔkyere tseneneeye. Dem ntsi nda ebiasa a yerebedzi no Jalsa yi ase yi, ndzeyee pa ahorow pii ahye mu ma yi, de beserew na akyere enyigye so ye ndzepa. Nhyiamu ahorow na ɔba a dem ndzeyee yi hia, ntsi dem akwanya yi wɔ hɔ ma afrefo nye nsatofrefo nyina.

Medze afotu a no mu ye dzen ma hɔn a wɔdze dwumadzi ahye hɔn nsa no de, ber a woridzi nkɔmbɔ anaa wɔreye edwuma bi no wɔmfa serew nye enyigye nye- obi bere a, dem ndzeyee yi ne nyee ye dzen papaapa naaso ɔwɔ de yeper na ye ye. Hɔn a wɔdze nyimpakuw

bi ahye hɔn nsa no so wɔ de wɔdze serew na enyigye kyere hɔn dɔm a wɔhye hɔn tumdzi ase no. dzibewdzifo no wɔye nhyehyee ma hɔn ma wɔkedzidzi wɔ bea soronko bi, mbom bea a banodzifo nkumaa nnyi ho kwan de wɔbefa biribi wɔ hɔ no, anaade ɔtaa si de se edwumayefo bi kɔnom nsu ketsekete bi mpo wɔ hɔ a, ɔma nkorɔfo hɔn bo fuw. Dem ndzemba yi onnyi kwan de osisi. Kwan biara do no, de mbre m'aka no, wɔ edwumaye mu no, ndzemba pii sisi wɔ hen ntamu a ɔto sin, mbom yenkaa mber nyinara de, ɔwɔ de supa dzi hen kan.

Ampaara de, yebekyere supa na yeaserew akyere hen ahɔho dze, naaso se yedze iyi ye hen ndzeyee na yedze kɔ nyee mu a, obenya nsunsuandopa soronko bi wɔ hen ahɔho do na ɔdze nsakyerpa a ɔdze dew na ahohoahoa soronko beba. Iyi bekere tsenenee su akyere nsatofrefo a wɔnnye Kuwmba a wɔbeba Jalsa no bi no. na ɔbɔkrɔn hen tseneneeye se yeda supa edzi a, na yebeye hɔn a wɔtwetwe Nyankopɔn N'enyimpa no.

Dem ntsi hɔn a wɔdze edwumason bi ahye hɔn nsa nyinara nkaa de, se esom ɔhɔho bi a ɔnkyere de reye obiara adom bi. Mbom de mbre Anohoba Mesia (ANN) no aka no, na mara ankasa so m'aka no dada no, na ɔye dza Nkɔmhyenyi Krɔnkrɔn no kaa kyere hen no, de ɔye ɔhɔho biara ne kyefa Na eben nsem na Allah aka afa hia a ohia de yebehye hen ahyedze ma? Wɔ fabi no, Allah ka de:

“Na dza ɔse de hom dze ma hom ebusufo no, hom mfa mma hɔn ɔnye ehiafo, nye akwantufo, na mma hom nnsɛe hom ahonya wɔ ahanta kwan do” (17:27).

Ha, nyimpakuw ebiasa hɔn kyefa na wɔabɔ dzin wɔ ha, mbom yeretwe hen adwen egyina nsempɔw a yeredweendwen ho nde yi, mepɛ de metwe ankorankor biara n'adwen gyina akwantufo do. Akwantufo gu mu ahorow pii. Mbom hɔn a wotu amantu kwan ɔnam Allah na Ne mbra ntsi, woyinom nye hɔn a wodzi mu wɔ akwantufo nyinara mu.

Hadith bi ka de, wɔ nhyiamu biara a wɔbɔ Allah, ɔsorsornyi No nye No Somafo no hɔn dzin wɔ ase no, ɔsor Abɔfo dze asomdwee nhyira ba hɔ na wɔsere mpaabɔ ma hɔn a wɔwɔ nhyiamu no ase no nyinara. De mbre ɔbeye ma abeka dem nhyiamu yi ho no, hɔn a woetu amantu kwan no, hɔn gyinabew wɔ sor ara yie ampaara, ɔnam enyisoadzehu a ɔnam do ma wɔbaa no osiande abɔfo robɔ mpaa ma hɔn. Dem ntsi hɔn a wɔsom dem akwantufo yi, hɔn tsir aye yie papaapa.

Obiara a ne kyefa no Nyankopɔn na ɔhyehyee no, nyia biara a ɔbehye dem ahyedze anaa asodzi yi ma no, onya Nyankopɔn N'enyimpa. Na nyia a onya Nyankopɔn N'enyimpa no, woana na ne tsir aye yie kyen no? Ntsi se yedwen iyi ho a, yebohu nwanwa a dem nhyehyee yi ye, dem Jalsa ne Nazim de ndzeyee pa biara n'ekyir no, abobow fofor buei ma ndzeyee tsenenee ma obiara. Dem ntsi, de mbre mekaa no ahyese no, obiara a woetu noho ama de ɔbɔsom no, wɔde ɔtse ɔsom sunsum ase yie na ɔdze dzi n'enyim kan. Iyinom wɔye no dadaw dze, naaso ɔwɔ de mpontu ba mu.

Hɔn a wɔdze dwumason bi ahye hɔn nsa no, onnyi de wodzi dwuma a ɔtse dem de osiande Jama'at na ɔhye hɔn de wɔnye mfa mboa hɔn a wɔreye dem edwuma no, anaade Sadr Majlis Khuddamul Ahmadiyya na ɔkyere de ɔwɔ de yeye waqar-e-amal ntsi hom mbra mbɔboa anaade dem asem yi fi Sadr Lajna hɔ. Dabida! ɔwɔ de wɔdze ye hɔn botae de wɔdze rohwehwe Allah N'enyimpa. Kwan ben do na Nkɔmhyenyi Krɔnkrɔn (NNN) no n'akadofɔ no soom hɔn ahɔhoe dze hwehwee Nyankopɔn N'enyimpa na wɔdze hyee hɔn ma?

Mebema mfatoho kor per. Ommfa ho mpen dodow a yeatse anaa yeakan dem asem yi, ama obi nya adzesuadze fofor. Hadhrat Abu Huraira (ra) ka de, mber bi okwantufo bi baa Nkomhyenyi Kronkron (NNN) nkyen. Dem ntsi osomaa de womfa edziano bi mfi ne fie mbre okwantunyi yi. Mbuaa a wodze bre Nkomhyenyi Kronkron (NNN) nye de se woyi nsu fi ho a, edziban biara nnyi fie ho bio dem da no. Ber a otsee dem mbuaa no, Nkomhyenyi Kronkron (NNN) no bisaa n'akadofa no de woana na obotum aye nyehyee ma wodze edziban abre okwantunyi yi? Ansarnyi kor kaa de obeye nyehyee no. Okor fie kekaa kyeree ne yer de onye edziban mma Nkomhyenyi Kronkron (NNN) no hohoe bi. Ne yer no kaa de, edziban biara nnyi ho gyede ma mbofra a wowo fie ho no bedzi ada. Ansarnyi yi buaa ne yer no de onye edziban no na odu ber a oroboto pon a, onso kandzea na omma mbofra no nda. Ntsi oyer no yee de mbre no kun no hyee no no pepeper na ber a oroto pon no, osoo kandzea ma mbofra no dze kom na awerehow kor ndaa mu, na wosoree de woreye kandzea no yie na wodze enyidaho dum kandzea no. Dem abaatan beenu no nyinara nye ohoho no tsenaa pon noho yee de mbre woridzidzi naaso woendzi edziban kor mpo na wodze kom daa dem anadwo no.

Adze kyee no, Ansarnyi yi kor Nkomhyenyi Kronkron (NNN) no ho na Nkomhyenyi (NNN) no serewee kaa de, hwe Nyankopon serewee wo ber a Ohun dwumadzi a hom dzii no ndeda anadwo no, na okaa de Nyankopon N'enyi gyee hom beenu no nyinara hom ndzeyee noho papaapa. Iyi na wohwee ho yii dem kyefa yi: "Mbom wodoo amantufu kyee honho, kansa woye ehiafo dobodobo mpo a. Na nyia biara a otwe noho fi afefewdze ma ne kra ho no, woyinom na wobeye nkunyimdzi no" (59:10).

Hwe aforboben na okyen de bema wo mba wada kom ma wo hohoe edzidzi amee. Nde Allah N'adom ara ntsi iyi nnye obiara ne gyinabew. Na iyi onnsi wo Jama'at ahohoye mu koraa. Dem ahoho no a onam do ma ebusua no bo dem afor no, nna hon so ye Jama'at mba osiande wotuu gyedzi akwantu. Nna woye ahoho a wobehyiaa Nkomhyenyi Kronkron (NNN) no. se woma hen dem mfatoho yi a, nna worekyere hon ahohosom no bo a osom nye noho mfaso. Dem ohoho yi a nna oye Nkomhyenyi Kronkron (NNN) no hohoe no onyaa gyinabew a okron yie papaapa na nde hon a woye dem nyimpa no a oye Nkomhyenyi Kronkron (NNN) no dfo nye n'akowa nokwarfo mapa no n'ahohoe no, hon so woma hon gyinabew a oye mfaso pii. Dem ntsi, edwumayefo nyinara mma dem yiedzi yi ndzi hon enyim kan na wonsom Anohba Mesia (ANN) no n'ahohoe.

Iyi reye aye de, mbofra no wohyee hon kutupa ma wodze kom daa naaso mfatoho a no mu do yie wo dem aforboben wo dem kwan yi mu a ebusuafu no nyinara na woboo afor a otse dem no- binom dze enyigye na binom so dze nyee. Osi pi ye nokwar de Allah huee N'adom na Ne nhyira guu dem mbofra yi do de mbre yehu no nyiyimu no mu no.

Allah Osorsornyi no dze dem nkorofu yi aka muflayhoon (nkunyimdzi) no ho. Na woananom na wonya nkunyimdzi (falah) no- se yehwe iyi ne nkyereasee a, yehu de otre yie. Dem nkorofu yin ye hon a yehu de woye pramprom na wonya nkodo mber nyinara, hon a w'adom hon nkunyimdzi, hon a hon nsa ka tsenenee nye ahotsewee biara a worohwehwe na onam dem ntsi wonya enyigye na yiedzi. Hon nye nkorofu no a hon nkunyimdzi na enyigye tse ho afeboo. Hon nye dem nkorofu no a wonya asomdwee na nkabomu wo hon abroboben mu.

Hòn nye dem nkorɔfo no a wonya ahweyie na bambɔ no. ntsi se wɔdze edziano kor mpo bɔ afɔr hye ahyɛdze a wɔwɔ ma ahɔho ma a, wɔbɛka hɔn a wɔtwetwe Nyankopɔn N'enyimpa no ho na iyi dze hɔn gyina gyinabew a ɔkrɔn papaapa. Nyia biara a obenya dem Nyankopɔn N'enyimpa yi nyinara no, ebenadze bio na obehia no?

Ntsi mber nyinara kaa de iyi nye gyinabew a wɔdze ama hɔn a wɔhye hɔn ahyɛdze a ɔfa ahɔhosom ho ma. Iyi nye gyinabew a ɔwɔ de yeɔ mbɔdzen na yeper de hen nsa bɛka wɔ ber a yerosom hen ahɔhoe. Iyi nye mpenpendo a se yenya Nyankopɔn Ne nkyen mbenee a, ɔbetsentsen hen ndzeyee wɔ wiadze yi mu nye ndankɔamma. Ntsi wɔma yenkaa de, se wɔma hen akwanya de yensom Anohoba Mesia (ANN) no n'ahɔhoe a, nna Allah Ɔsorsornyi No rubuei kwan ama hen ma yeabɛka muflayhoon (nkunyimdzifo) no ho.

Ketseankye Allah ama hɔn a wɔdze henho abɔ afɔr no nyinara, dzibewdzifo nye edwumayefo nyinara abeye dem nkorɔfo no a wonya adom no bi. Nyankopɔn mboa hen na Ɔntsentsen ntotoe biara a wɔreye ama Jalsa yi ma ɔnye nkunyim.

Se yewie Jumma asɔrye no a, mebedzi enyim ma yeaye funsie asɔr a fun no nnyi ha ama onuabanyan Zahoor Ahmad Sahib Kayani a wodzii no ewu wɔ Orangi Town wɔ Karachi wɔ Dzifuu bosom ne da a ɔtɔdo eduonu-biako (21st August). Inna lillahi wa inna ilaihi rajioon (ampaara de ye ye Allah dze na Ne nkyen na yeɔesan akɔ). Dem emimdzi yi mbre ɔyee sii nye yi. Zahoor Sahib kɔ de ɔrokɔhwɛ ne tseaseanam bi a osi bea bi a ɔnye ne fie no mu twe kakra. Nna ɔdze reba fie wɔ ber a ɔdze kor nsiesie. Ber a ɔnam dem botae yi ntsi opueii fii ne fie no, Noorul Haq Sahib a ɔnye no bɔ fipam so pueii. Nna wɔabɔ anapa dubiako apaho sima duenum (11:15AM). Wɔkɔhwɛ tseaseanam no wiee a wɔreba no, nyimpa ebien bi a wɔtse kutuktufenfem do baa na hɔn mu kor sii famu na ɔhyee ase paa itur guu Zahoor Sahib do. Iyi rokɔ do no, Noorul Haq bɔ mbɔdzen de nkye obesiw ano, nna nyimpa kor no so san itur guu Noorul Haq so do, iyi ekyir no woguanee.

Ber a Zahoor Sahib ne ba baa tsee itur ne nka no, ohun dem nyimpa beenu a wɔtse kutuktufenfem do yi de woruguan na ɔtoow tee (tea) a ɔwɔ kɔɔpow (cup) mu ma ɔronom guu hɔn ho. Dem nyimpa yi san itur guu ɔno so do. Mbom ne tsir ye yie ma ɔno dze woennpira na Zahoor Sahib dze, wodzii no ewu. Nna woedzi mfe eduanan esuon (47). Ye ye Allah dze na Ne nkyen na yeɔesan akɔ. Nuroolu Haq Sahib a ɔye ne nyenko a ɔnnye Ahmadiyyanyi no so wodzii no ewu demara. Yesere de Nyankopɔn nhu no mbɔbɔr na Ɔmfa no mfom nkye no.

Ahmadiyyasom baa Kayani Sahib n'ebusua mu a, nna ɔnam ne papa ne nua kumaa a ɔdze Yusuf Kayani Sahib na Muhammad Saeed Kayani Sahib do. Hɔn beenu nyinara adom dom hɔn ma wɔyee Bai'at wɔ afe 1936. Nna hɔn beenu nyinara wɔ nyimdzee ara yie na wɔyee Bai'at wɔ ber a nna wɔakan mbuukuu ahorow. Iyi ekyir no, Zahoor Sahib ne papa na no wɔfanom ebiasa gyee Ahmadiyyat too mu. Dem ebusua yi nna wɔnye Premkot, Kashmir wɔ twaka.

Zahoor Sahib wɔwoo no afe 1966 na ɔketsenaa Karachi wɔ afe 1976. Hɔ na osuaa nwoma nyaa abɔdzin krataa BA na onyaa edwuma wɔ Federal Board of Revenue. Kepem ber a wodzii no ewu no, nna ɔye edwuma kyerekyerewfo ma okuw a wosiw katasehye ano. Nna ɔye obi a ɔye setsie ma Majlis papaapa, ɔwɔ ɔdɔ na ɔka nkorɔfo no a hɔn sika afɔrbɔ wɔ sor

noho. Nna ɔye mbɔbɔrhufɔ na ɔye dansewa wɔ iyi mu. Ɖnnkema ɔhɔho bi efi ne fie ako wɔ ber a ɔnnkyerɛɛ no dɔ nye ehumbɔbɔr nnkyerɛɛ no. Nna Jama'at yi mu banodzifo nyinara dze obu ma no, na ne ndzeyɛɛ nyinara nnye adze a obi benya ho asem kor mpo aka. Ne nyenko bi a nna ɔwɔ ne fun ho na orusu de Zahoor Sahib ye obi a ɔwɔ ɔdɔ ara yie ma nyimpa na mber nyinara n'enyisoadzehu nye de ɔdze nkabɔmu na korye beba. Ɖkaa de, se ɔtɔfabi na ebufuw ba a, Zahoor Sahib dze abotar afotu ma hɔn. Hɔn edwumamu mpanyimfo nyinara ka de Zahoor Sahib ye ɔkokodurfo a wɔaye krado de ɔdze ne kra bɔto hɔ ama afoforfo wɔ dem kwan yi mu, na ɔye obi a ɔdze n'abrabɔ twetwe nyimpa ba ne nkyen mber tsiabaa bi mu. Nde yɛahwer dem nyenkopa yi.

N'asew banyan, Bashir Kayani Sahib ka de, Zahoor Sahib ye obi a nna wɔaye krado de ɔbɔboa busuanyi biara. Nna ɔye ɔdzefo wɔ sika afamu ntsi mber biara a busuanyi bi bɔko ahokyer mu no, ɔno na wɔdan no. hɔn a wɔnnye n'ebusuafo mpo, mmba ne nkyen na wɔnnko nsapan. Ɖdze ɔdɔ soronko tsetsee ne mba. Mber nyina ɔhwɛ de wɔaye ne mba hɔn ehiazde ama hɔn na hɔn nwomasua so ɔmmfa nndzi agor koraa. Nna ɔye ahweyie kese wɔ hɔn nkitahodzi mu. Ne yer ka de, Allah domm no akomapa ara ma wɔ n'emimdzi mu no mpo, wɔdomm no akomapa. Ɖnnye obi a ɔpampam mbofra. Ɖka de, mber tsiabaa bi mu ansaana wɔrebedzi no ewu no, ɔkaa de wɔmpɛpa no asopaatsee (shoes) bi ho mma no na ɔreba siesiara, na ɔserewee na opueii. Ne yer ka de, ɔtsee dem ewurkadze yi a opueii no, ɔhwɛ ne'enyim nye mbofra no na ɔserewee tse de, mbrɛ ɔreka ne nsem a odzi ewie na ɔtoaa ne Bɔfo. Ɖnoara ankasa dze, ɔnnka hwee nkyerɛ ne mba, mbom se me Khutba ba wɔ MTA a, ɔhye hɔn ma wotsie na se wɔannye a ɔkyerɛ ma wohu de n'enyiwa anngye hɔn ndzeyɛɛ noho. Nna n'enyiber tse iyi ho papaapa. Nna ɔwɔ ɔdɔ nye tsema nkitahodzi soronko ma ne mba mbasiafo. Ebusua a ogyaa hɔn ekyir nye ne yer Tahira Zahoor Kayani Sahiba nye mba mbanyimfo baasa na mba mbasiafo baanan. Imran Kayani a woedzi mfe eduonu (20years); Kamran Kayani a ɔwɔ mfe duanan (14years); Sarfraz wɔ mfe ebiasa (3years); Noorul Saba wɔ mfe duesia (16years); Noorul Ain wɔ mfe duanan (14years); Attyatul Mujeeb edzi mfe esuon (7years) na Faiqa Zahoor wɔ mfe enum (5years).

Yɛsere de, Allah, Ɖsorsornyi No nkrɔn onua yi ne gyinabew na Ɖnhwe mba na okunafo yi wɔ Nara Ne nhwedopa mu nye Ne bambɔ mu na Ɖndom hɔn pintsinn gyina wɔ ber a woridzi awerehow yi mu.

Translated by: 1. Mr. Alhassan Kobina Atta-Wenchie
(Tutor, Jamiatul Mubashireen, Ghana)

2. Mr. Rasheed Possible Essuman Sahib
(Second Year Student, Jamiatul Mubashireen, Ghana)

Downloaded from: www.jamiatulmubashireen.org

Contact: www.jamiatulmubashireen.org/contact-us